

Laudatio zum Abschied von Kurt Schreiber an der Gemeindeversammlung vom 27. März 2014

Liebe Kurt

Im Name vom Gemeinderat und vo dä ganze Dietliker Bevölkerig möchtet mir Dir für Dini gleischteti Arbeit i euserem schöne Dorf danke.

Du bisch 10 Jahr FÜRwehrkommandant gsii und die letschte 14 Jahr im G'meindrät und davo 12 Jahr als Presidänt.

Du häsch es immer Verstande ä gueti Atmosphäre und Läbesqualität ii euserem Dorf z' schaffe.

Kei Uufgab isch Dir z' vill gsii, im Gägäteil Du häsch Dini Pflichte ernst g'na und eusere Bevölkerung Vertraue, Lob und Reschpäkt entgäbracht.

Unzählige Jubilare, Vereinsanläss, Konzerte, Uusstellige usw. häsch Du mit Dinere Awesenheit und Dine immer gut abg'fasste Dankeswort geehrt.

Nöd z'vergässe euseri 1. Augustfiir ufem wunderschöne Dorfplatz, wo Du Persönlicheite wie Stefanie Glaser, Mister Schweiz, Uli Forte, Eufemia Stadler und vielne mehr Glägäheit gä häsch, ihres persönliche Bild und Asichte zu euserem Nationalfiirtig dä Dorfbevölkerung z'überbringe. Mit em Akrobat, David Dimitri, häsch Du öpis Neus und Eimaligs anere Bundesfiir uf eusem Dorfplatz g'schaffe.

Mit dä Schwiizer Patenschaft für Berggemeinden fühlst Du Dich sehr nah verbunde und häsch Dich immer vehemänt für die Patenschaft iig'setzt. Dietlike hät sit vielne Jahre Projekt, und g'rad wieder a dä letschtä Gemeinderatssitzung beschlosse, die Projekt z'understütze.

Mer hät jederziit zu Dir is Büro chönne gah und G'schäft oder anderi Problem mit Dir z'bespräche. Immer häsch es offnes Ohr gha. So hämer villi Lösige g'funde. Mir händ au öppe chöne Schimpfe und veruckt sii, aber mir händ au chöne Lache.

A dä Gmeindrätssitzige bisch du immer Dossiefescht und Guet vorbereitet gsii. Häsch aber au uuf eus g'loset und eusi Meinige reschpektiert. Wänns emal ä chli härt und äng worde isch, so häsch du au chöne en Pfahl ischlaa und säge: so fertig jetzt!

Mir vom G'meindrät händ dänn immer gseit: Eus isch gliich wär under eus G'meindspresidänt isch.

Nach dä letschte Gemeinderatssitzung hört's jetzt au uf mit Tagliatelle San Marco, Fleischkäse Spiegelei und Pommes, oder Gordon Bleu und es „Glesli“ oder Zwei „Rote“.

Kurt, das isch ä schöni unvergässliche Ziit gsii, mir händ's im G'meindrat immer g'nosse mit Dir.

Es Sprichwort; *hinteremä starche Maa, staht au ä starchi Frau.*

D'Ruth hät Dich immer begleitet und unterstützt. Au hät Sii immer Verständnis entgegengebracht, dass Du villi Aläss und Verpflichtige ohne Sii häsch müesse wahrnäa. Sii hät uuf villes während Dinere Abwesenheit müesse verzichte und entbeere.

Es heisst aber au: *wer vill furt gaht chunt au vill hei!*

Ruth, jetzt wird alles anders und dä Kurt isch wieder jede Abig schön brav dä'heime!
Herzliche Dank Ruth.

Statistik

- Im 2000 stille Wahl als GR
- 14. April 2002 Wahl zum GP im 2. Wahlgang
- 2006 + 2010 Ehrevolli Wiederwahl als GP
- Von 320 GR Sitzungen in 14 Jahren häsch nume 14 x gefehlt = 1 x per Jahr = 96% Anwesenheit
- Gegen 15000 Stunden als GR und GP häsch Du für eusi G'meind g'schaffed
- 41 GV mit ca. 80 G'schäft und a keinere gefählt
- Dänkwürdig Dini erschi GV vom 20.06.2002 als Präsident:
Besoldungsverordnung war damals Dini Meischerprüefig.
Diskussion – Antrag uf Ablehnig vo dä Vorlag – Änderigsaträg – und zu guter Letscht no ä g'heimi Abstimmig. Versammlungsendi um 23:50!!

Kurt wir möchtet Dir noomal für alles danke, wünsched Dir ä gueti Gesundheit und no villi glückliche Jahr z'ämmä mit Dinerä Familie.

Chum au wieder emal am Dunschtig am halbi Zähni is G'meindshuus zumä Schwätz.

Vor dä G'schänks Übergab no än chline Uusschnitt us em letschte Zitat vom Köbi Rutschmann anlässlich der erschtä GV vo Dir und am Köbi sinere Verabschiedig:

*Ich wünsch eus allne und ich säg das gärn
vill Glück underem goldige Dietliker Stärn.*

Danke für d'Ufmerksamkeit!

Ehrung Kurt:

Jetzt häsch Du vill Ziit für zum Velofahre. Wir schänked Dir es Velo, es isch z'war reparaturbedürftig, aber Du häsch jetzt ja Ziit zum Repariere.

Da wir glaubed dass Du das nöd so guet chasch, händ wir Dir än Guetschii und än Proschpäkt für ä neus Velo.

Jetzt wirscht Du vo eusene beide Ehrendame, Edith und Cristina, als Sieger ii'g'kleidet und es folged die obligate Siegerküss und Foto.

Und dänn ganz zum Schluss eine vor Dinä Sprüch:

Einer hat immer das letzte Wort

nach der Siegerehrung und Foto „häsch es dänn“

Ewald Benz

1. Vizepräsident

27. März 2014

